

DOMINGU XXV TEMPU KOMÚN – TINAN A

Tema

Liturjia Domingu XXV Tempu Komún nian konvida ita atu deskobre Maromak ida ne'ebé ninia dalan no hanoin sira aas liu ema nia dalan no hanoin sira, hanesan lalehan aas liu rai. Nu'udar konsekuénsia, husu ita atu hakribi eskema mundu no konversaun ba eskema sira Maromak nian.

Leitura dahuluk husu fiar-na'in sira atu fila ba Maromak. “Fila ba Maromak” mak movimentu ida ne'ebé ezije transformasaun radikál ema nian, atu ninia hanoin no hahalok sira refilete Maromak nia lójika, perspetiva no valór sira.

Evanjellu dehan mai ita katak Maromak bolu ema hotu ba salvasaun, hodi la konsidera ema nia fiar nia antiguidade (kleur ona), ema nia kréditu sira, ema nia komportamentu antigu sira. Maromak interese de'it katak ita simu ninia konvite. Nia husu transformasaun ida ita-nia mentalidade nian, atu ita-nia relasaun ho Maromak la marka ho interese, maibé marka ho domin no gratuidade.

Leitura daruak apresenta mai ita ezemplu sarani ida-nian (Paulo) ne'ebé hakohak, ho forma ezemplár, Maromak nia lójika. Nia hakribi interese pesoál sira no eskema sira egoíзму no komodizmu nian, no tau Kristu, ninia valór sira, ninia projetu, iha sentru ezisténsia nia.

LEITURA I – Is 55,6-9

Deutero-Isaías, autór testu ne'e nian, mak profeta anónimu ida pertense ba eskola Isaías nian, ne'ebé kumpre nia misaun entre eziladu sira Babilónia nian, hodi buka konsola no mantein lakan povu ne'ebé laran-kraik nia esperansa. Tan ne'e, kapitulu sira ne'ebé halibur ninia mensajen (Is 40-55) hanaran, “Livru Konsolasaun nian”.

Versíkulu haat ne'ebé leitura dahuluk ohin nian propoin mai ita mosu iha finál “Livru Konsolasaun nian”. Libertasaun besik daudaun no, ba eziladu barak, momentu atu fila hikas ba Rai Prometida besik daudaun ona. Uluknanai profeta husu eziladu sira atu kumpre ézodu foun. Hafoin garante tiha sira katak, Jahwéh prepara ba sira meza festa nian iha Judá (kf. Is 55,1-3), profeta, oras-ne'e lansa ba sira dezafiu seluk...

Tempu Ezíliu nian mak tempu angústia no sofrimentu nian, maibé mós tempu maturasaun no grasa nian. Iha-ne'ebá, Israel hola konxiénsia kona-ba ninia falla no infidelidade sira, no deskobre katak hadook husi Maromak la lori ba moris no ba ksolok; husi sorin seluk, tempu Ezíliu nian tulun Israel purifika ninia nosaun/konseitu kona-ba Maromak, Aliansa, kultu no mós signifikadu sai Maromak nia Povu.

Deutero-Isaías – iha momentu ne'ebé loke horizonte foun – konvida ninia sidadaun maluk sira atu la'o iha dalan konversaun no deskobre hikas Maromak ne'ebé esperiénsia Ezíliu nian revela ba sira. La'o hikas ba Terra Prometida la'ós “dalan” jeográfiku de'it, maibé liuliu, “dalan” espirituál ida hasoru malu hikas nian ho Na'i. Husik rai moris-atan nian no fila ba rai liberdade nian tenke signifka, ba Israel, deskobre fali Maromak nia eskema sira no esforsu sériu atu moris iha fidelidade dinámika Jahwéh nia ukun-fuan sira.

MENSAJEN

Profeta nia apelu mak apelu atu hahú filafali, halo dalan foun iha istória, katak hafoun an husi

esperiéncia Ezíliu nian, Israel tenke buka nafatin Na'i, invoka Nia, kuda lasu komuñau no babesik/proximidade ho Nia.

Fundamentalmente, Israel simu konvite atu konverte an eh, literalmente, atu “fila hikas (iha ebraiku: 'shûb') ba Maromak”. “Konversaun” ne'e ezije transformasaun radikál ida ema nian, iha mentalidade, iha komportamentu (“ema aat husik nia dalan no ema hanoin aat husik ninia hanoin sira” – vers. 7).

Mentalidade, valór sira, atitute sira “ema aat nian” no “ema hanoin aat”, dook liu husi Maromak nia mentalidade, valór sira no eskema sira. Ema aat sira nia moris funksiona iha lójika ida egoísmu nian, orgullu nian, autosufisiénsia nian, violénsia nian, esplorasau nian; eskema sira “ema aat” nian hamosu sofrimentu, ksolok-laek, mate... Maromak funksiona iha lójika domin nian, servisu nian, partilla nian, doasaun nian; Maromak nia eskema sira hamosu ksolok, dame loos, vida definitiva.

Ba Maromak nia Povu, profeta husu atu hadook an husi “ema aat” no “ema laran-aat” nia lójika atu hakohak Maromak nia lójika; husu atu nia la hateke ba rai, maibé hateke ba lalehan no kontempla Maromak nia orizonte sira; husu atu nia hatene konfia Maromak no komprende ninia dalan loos sira. Nune'e de'it mak Povu bele haksolok iha Rai ne'ebé nia atu bá hikas fali; nune'e de'it mak Israel bele kontinua sai fiél ba ninia misaun atu fó sasin iha povu seluk nia leet.

Konversaun implika mós mudansa iha forma atu hateke ba Maromak. Ema iha nafatin tendénsia atu harii maromak ida tuir ninia ilas, maromak ida ne'ebé bele prevé no halo sai maus, ne'ebé funksiona tuir ema nia lójika no mentalidade. Maski nune'e, ita labele redús Maromak tuir ita-nia eslema umanu sira: Ninia hanoin sira la'ós ema nia hanoin sira, Ninia reasaun sira la'ós ema nia reasaun sira, Ninia dalan sira la'ós ema nia dalan sira. “Konverte an” iha nivel ne'e mak, aprende katak ita labele redús Maromak ba ita-nia lójika no eskema sira; no aprende katak Maromak iha ninia dalan rasik, diferente husi ita-nian... “Konverte an” iha nivel ne'e mak, husik ita-nia serteza sira, prekonseitu sira no autosufisiénsia, konfia iha Maromak no ninia dalan sira nia di'ak, hodi hatene katak liuhusi ne'e mak Nia gia istória salvasaun nian.

LEITURA II – Filip 1,20c-24.27a

Filipos, sidade iha norte Grécia nian, mak sidade europeia dahuluk Paulo evanjeliza. Nia mak sidade próspera, ho populasaun ne'ebé maioria veteranu sira ezérsitu romani. Sidade ne'e organiza tuir maneira Roma nian, nia la tama iha iha jurisdisaun governante sira provínsia lokál nian no depende direktamente ba imperadór; nune'e mak nia goza priviléjiu hanesan ho sidade sira Itália nian.

Komunidade sarani ne'ebé funda husi Paulo, Silas no Timóteo iha bailoron tinan 49, mak comunidade laran-manas ida, laran-luak, komprometida, nafatin iha atensaun ba Paulo no Igreja seluk nia nesesidade (hanesan kolekta sira halo ba Igreja Jerusalém nian – kf. 2 Cor 8,1-5). Paulo iha afetu/domin espesiál ba Filipos nia “oan sira”.

Iha momentu nia hakerek surat ba Filipos nia oan sira, Paulo iha kadeia (iha Éfeso?). Husi sarani Filipos nian, Paulo simu osan no membru ida comunidade nian (Epafrodito), ho knaar atu tulun Paulo iha buat hotu nia presiza. Hodi haruka fila Epafrodito ba Filipos, Paulo entrega ba nia surat ida ba comunidade. Ne'e mak surat nakonu ho domin, iha-ne'ebé Paulo agradese sarani Filipos nian ba sira-nia preokupasaun, delikadeza no domin. Iha nia, Paulo agradece, fó notísia sira, informa comunidade kona-ba ninia sorte no ezorta Filipos oan sira ba fidelidade ba Evanjellu.

Testu ne'ebé ohin propoin mai ita halo parte períkopa ida (kf. Flp 1,12-26), iha ne'ebé Paulo ko'alia ba Filipense sira kona ba nia an rasik, ninia situasaun, ninia preokupasaun no

esperansa sira. Paulo konxiente katak nia iha perigu moris nian, maibé nia hakmatek, haksolok no laran-metin basá buat ida-mesak ne'ebé interese ba nia mak Kristu no Ninia Evanjellu.

MENSAJEN

Paulo dadur hela bainhira hakerek surat ba sarani sira Filipos nian. Nia la hatene se nia sei sai moris eh mate husi dadur, maibé, ba nia, buat ne'e la importante; buat ne'ebé importante mak haboot Kristu –liuhusi apóstolu ne'e nia moris eh hodi ninia mate.

Ba Paulo, Kristu mak moris auténtiku. Nia mak razaun ba ninia sai an rasik no ninia moris nu'udar apóstolu. Iha Paulo nia perspetiva, nia simu mate ho liman rua, hodi fó benvindu, la'ós nu'udar libertasaun husi difikuldade no terus sira ne'ebé esperimenta iha rai, maibé nu'udar dalan ne'ebé lori loos ba enkontru definitivu, imediatu, lahó intermediáriu sira, ho Kristu. Paulo kontente atu mate iha tempu badak nia laran, tanba ida-ne'e signifika komuñauñ total ho Kristu. Kona-ba ida-ne'e, signifika liu ninia fraze famoza ida (ne'ebé hakerek iha ninia rate, iha Roma): “ba ha'u moris mak Kristu no mate mak lukru”.

Maski nune'e, Paulo konxiente katak Maromak bele iha planu seluk no hakarak atu nia kontinua – ba komunidadade sarani sira nia benefísiu – tempu ruma tan iha rai, atu fó testemuñu ba Kristu nia Evanjellu. Paulo aseita ida-ne'e: tan Kristu, nia dispostu ba buat hotu. Loloos, buat ne'ebé konta la'ós Paulo nia interese sira, maibé Kristu nia interese sira.

EVANJELLU – Mt 20,1-16a

Iha testu ne'ebé propoin mai ita, Jezús kontinua hanorin ninia dixípulu sira, atu sira komprende realidade Reinu nian no, bainhira Jezús bá ona, sira fó sasin kona-ba Reinu. Leitura ohin mak “aikanoik” ida tan “Reinu nian”.

Kuadru ne'ebé aikanoik apresenta mai ita reflète didi'ak realidade sosiál no ekonómika Jezús nia tempu nian. Galileia nakonu ho to'os-na'in sira ne'ebé, tanba presauñ fiskál eh tanba to'os la fó nafatin rezultadu di'ak iha tinan sira tutuir malu, sira lakon tiha rai sira pertense ba sira-nia família. Atu moris, to'os-na'in sira ne'ebé lakon sira-nia rai, aluga sira nia forsa serbisu nian. Sira halibur iha prasa sidade nian no hein atu rai-na'in sira halo kontratu ho sira atu serbisu iha sira-nia to'os sira. Normalmente, “patraun” ida-idak iha ninia “kliente sira” – katak, ema sira ne'ebé nia konfia no halo kontratu ho modu regulár. Traballadór sira “konfiansa nian” ne'e simu tratamentu favór nian. Tratamentu ne'e implika katak, “kliente” sira-ne'e mak ema uluk atu hetan kontratu, atu bele manán saláriu loron ida nian (“denáriu” ida, pagamentu diariu baibain ba traballadór ne'ebé la espesializadu).

MENSAJEN

Aikanoik refere ba to'os-uvras nia na'in ne'ebé, dadeersaan de'it dirije ba prasa no bolu ninia “kliente sira” atu serbisu iha ninia to'os-uvras, hodi konkorda presu baibain: denáriu ida. Servisu barak ne'ebé tenke hotu iha to'os halo atu patraun sai tan iha dadeer nia klaran, iha meuidia, iha tuku tolu loraik no iha besik loron monu hodi lori grupu foun traballadór sira nian. Serbisu la'o di'ak lahó problema, to'o loron remata.

Bainhira loron remata, to'os-na'in bolu traballadór sira atu pagamentu ba sira-nia serbisu. Hotu-hotu – sira ne'ebé serbisu oras ida de'it nune'e mós sira ne'ebé serbisu loron tomak simu pagamentu hanesan: denáriu ida. Maibé, traballadór sira oras dahuluk nian (“kliente” baibain patraun nian) manifesta sira-nia surpresa no laran la kontente, tanba, sira simu tratamentu hanesan “favór” nian.

Resposta final to'os-na'in nian afirma katak ema ida la iha buat ida atu reklama se nia decide halo justisa no uza laran-sadia ba sira hotu, laho esesaun. Nia kumpre ninia obrigasaun sira ba sira ne'ebé serbisu ho nia husi inísiu; nia labele sai ema laran di'ak no laran sadia ba sira ne'ebé to'o ikus? Buat ne'e labele afeta sira seluk...

Aikanoik ne'e serve uluknanai ba Jezús atu hatán ba ninia adversáriu sira nia kítika, ne'ebé akuza Nia atu besik demais ho ema maksalak sira (traballadór sira oras ikus nian). Liuhusi aikanoik ne'e, Jezús hatudu ninia Aman nia domin ne'ebé suli ba nia oan hotu, laho esesaun no hanesan. Ba Maromak, la'ós desizivu oras ne'ebé ema hatán ba Ninia apelu; buat ne'ebé desizivu mak ema hatán ba Ninia konvite atu serbisu iha to'os Reinu nian. Ba Maromak, la iha tratamentu "espesial" tanba ema ida mai uluk; ba Maromak, Ninia oan sira hotu hanesan no merese Ninia domin.

Aikanoik ne'e serve mós ba Jezús, atu denuncia teólogo Israel sira ninia hanoin kona-ba Maromak no salvasaun. Liuliu ba farizeu sira, Maromak mak "patraun" ida ne'ebé selu tuir ema nia hahalok sira. Se ema kumpre didi'ak pontu hotu Lei nian, nia sei manán méritu no Maromak sei selu nia tuir ninia hahalok. Tuir perspetiva ne'e, Maromak la fó gratis buat ida ba ema. Ba farizeu sira "maromak" hanesan negociante eh kontratu-na'in ida, ne'ebé loroloron hakerek iha ninia livru rejistu ema nia tusan no kréditu sira, no loraun ida sei halo konta final, haree saldu no fó rekompensa eh aplika kastigu.

Ba Jezús, Maromak la'ós kontabilista ida, nafatin ho lápis iha liman atu halo ema nia konta atu nune'e selu tuir sira-nia meresimentu sira; maibé nia mak aman ida, nakonu ho laran-di'ak, ne'ebé hadomi nia oan sira hanesan no fó ba sira hotu, laho esesaun, Ninia domin.

Aikanoik ne'e, Mateus propoin hikas ba ninia comunidade (provavelmente comunidade sarani Antioquia Síria nian) atu leno situsaun konkreta ne'ebé comunidade moris ho jentiu barbarak tama Kreda. Sarani balun husi orijen judaika la konsege komprende katak jentiu sira, ne'ebé mai ikus, iha tratamentu igualdade nian ho sira ne'ebé simu proposta Reinu nian husi kedas oras dahuluk. Mateus halo klaru kedas katak, Reinu mak don ida Maromak oferese ba ema hotu laho distinsaun, Judeu eh gregu, atan eh livre, sarani oras dahuluk eh oras ikus nian, hotu-hotu mak oan doben sira husi Aman hanesan. Iha comunidade Jezús nian la iha grau tama uluk nian, rasa nian, klase sosial nian, meresimentu nian... Maromak nia don ba ema hotu, hanesan.

Konkluzoan: Aikanoik konvida ita atu komprende katak ita-nia Maromak mak Maromak ne'ebé oferese salvasaun ho modu gratuitu ba Nia oan sira hotu, independentemente husi ninia anitiguidade (kleur ona eh lae) iha Kreda, ninia kréditu sira, qualidade sira, komportamentu sira. Membru sira comunidade Reinu nian la bele, halo buat di'ak atu hetan rekompensa, maibé atu hetan ksolok, moris loos no rohan-laek.